

عفريته عشقاني

أشعار لـ...

إيمان رضوان

العنوان: عفريتة عاشقاني
الصنف: ديوان شعر
المؤلف: إيمان رضوان
تنسيقات طباعة: م. هالة محمود
مراجعة: أ. محمد فهمي
تصميم غلاف: م. أمير عبدالوهاب
مقاسات الكتاب: ١٤ * ٢١
عدد صفحات الكتاب: ٩٦
طبعة أولى: ٢٠١٩
الناشر: النوارس للدعاية والنشر
رقم الإيداع بدار الكتب والوثائق المصرية: ٢٠١٩/٥٤٣٢



الإسكندرية ش ٥ - ميامي ج.م.ع
ت: ٠١٢١١٩٩٩٠٨٩ ٠٣/٥٤٩٠٩١١

Elnwares.advertising@gmail.com

للتواصل على فيس بوك

<https://www.facebook.com/groups/322676661399274>

لا يسمح بطباعة هذا الكتاب أو تصويره أو نسخه بأي طريقة ورقية أو إلكترونية إلا بإذن خطي ومسبق من المؤلف..

التعريف بالشاعرة

إيمان رضوان
قاهرية سكندرية،
حاصلة على دبلوم تجارة،
اكتشفت موهبتي منذ خمسة أعوام،
أحب الشعر والقراءة منذ الصغر،
لم أكتشف الموهبة إلا في الكبر،
بدأت حضور الأمسيات والندوات
ووجدت من يشجعني لثقل موهبتي والحمد لله .
عمي كان زجال وأولاد عمي شعراء ..

كلمة الشاعرة قوت القلوب

وإنه لمن حظ الإسكندرية أن يكون بين ربوعها سيدة أدبية أوتيت بموهبة التعبير عن مشاعرها بكلمات تهز النفس، وتثري الوجدان وتوحي بالإرتياح، هي الشاعرة إيمان رضوان هذه الشاعرة لم تنال نصيبا من الشهره لأنها راضيه بأنها اذا عبرت عن أي خاطره من خاطرتها، كان الصدق رائدها وروعة الإبداع هدفها ..فتميز

طابعها الأدبي بعزة النفس ورقة الحس فجمع بين الأفراح والأحزان، كان قلمها رطبا باللفظ الجميل يبعث خواطر رقيقة، صافية، تفيض حنانا، تنبض انسانية، تتدفق عذوبه. والأدبية حين ترى أشعارها مجموعة ومطبوعة في ديوان فيكون أعز أمل لها قد تحقق، لأنها إتخذت من الشعر نجوى للنفس، صدق الوجدان، سلوان لها من الهموم الثقال، والأوجاع الفواح وهذا ما قدمته لنا الشاعرة في ديوانها(عفريته عاشقاني) رمزا لما تؤديه المرأة في ميدان الأدب الرفيع.

قوت القلوب

المقدمة

إيمان رضوان/ شاعرة بالفطرة لا تكتب بالقلم؛ إنما تكتب بنبض قلبها، تغزل من كلماتها وشاحاً مرصعاً بالجواهر لتتزين به قصائدها؛ فتخرج كأنها سلاسل ذهبية، أو أنهار تنساب عذوبة ورقة، تعزف بحروفها أجمل الألحان وأرق المعاني، لا تتكلف اللفظ بل تترك لقريحتها العنان فتجود باللفظ المناسب للمعنى المناسب، تشعر في كلماتها بصدق العاطفة؛ فإن أحببت فهي كليوباترا التي عشقت قيصر، وإن غضبت فهي شجرة الدر التي قتلت أليك. يدور ديوانها (عفريته عاشقاني) حول شكوى الحبيب والهجر وظلم الحبيب وقسوة الأيام والجدة وغيرها، تبدأ رحلتها الشعرية بقصيدة تبت فيها ألم الانتظار والبعد تقول في قصيدة (إيه يا زمن):

العمر فات والهجر طال
والانتظار كأنه جمرة فوسط نار
والقلب شاخ وسط الآلام
راسم علي جدار الزمن
خط الشقا

وتترك إيمان رضوان عالم الواقع إلى عالم الخيال فتتمنى أن تجد عفريته هانم لتحقيق لها أحلامها التي رأت أنها مستعصية تقول في قصيدة أنا عاوزة أروح البحر/ أنا عايزة أروح البحر:

واخودلي شمسية
أمسك ف سنارة
واصطادلي بلطية

أسحبها بالراحة
وبكل حنية
وألقاها مش سمكة
تطلعي جنية

ولكن العيش في الخيال مستحيل، فها هي تعود إلى حبيبها الذي
هجرها وتحاول أن تنساه، لكنها الحبيبة الوفية التي تندم وتعود
تقول في قصيدة جنون الحب:

يدوب ساعتين
يفوتوا عليّ زي يومين
وألوم روجي
وأتندم علي خصامه
وأحس الدنيا من غيره
خلاص وقفت بهجرانه
وأستنى
لحد ما يبجي يصالحني
يقولي الدنيا من غيرك
متلزمينش

وتتمثل الأصالة والعراقة في إيمان رضوان في قصيدتها الجدة
وتكشف لنا عن أسرار الجدات، وعن سمة من سمات الشخصية
المصرية القديمة، وهي الاحتفاظ بكل شيء له لازمة أو ليس له،
لكنها واقعية بكل ما تحمل الكلمة، بل لما عادت بنا إلى الزمن
الجميل وذكرتنا بأجمل ذكرياتنا مع الجدة وصندوقها تقول:

صندوق الجدة المتعبى
أوراق وخزين

فيهم كام ذكرى وضحاية

بين شوق وحنين

بالصدفة أنا بفتح خضنتي

وبصوتها العالي هزنتي

وكأني الكنز المتعبي

أنا حاذو وافوت

ومن قصائد إيمان رضوان ذات الطابع الغنائي التي تكشف عن
عمق الروح، جمال الصياغة وروعة التعبير قصيدة حبيب
عمري، التي انسابت فيها عاطفتها وجاشت بكل ما تحمل من
معاني العشق والوجد تقول:

أنا قدت شمع الفرح

وبدبت حياتي ببيك

وجمعت بستان أمل

بالحب مستنيك

وبشوق وحب سنين

من قلب دايب فيك

بحلم تكون لي

ومن قلبي أكون أنا ليك

أعشق وأدوب في هواك

واتمنى بكرة معاك

وف كل ثانية اروييك

وتمضي في رحلتها الشعرية حتى تشعر بالتعب وتتمنى الراحة
وتصالح نفسها تقول في قصيدة نفسى أرتاح:

أنا نفسي يوم أرتاح
أنا نفسي أنساني
وأطوي صفحة قديمة
وسوادها قساني
ألقاني واحدة جديدة
تصالحني ترضاني
وتكون بقلب جديد
تضحلكي علشاني

ورغم التعب والقسوة لكنها ما زالت تعشق، لكنها أبية، عزيزة، لا
تقبل الذل من الحبيب، فما هي تعلن الرفض لقسوته وتقرر
الانسحاب تقول في قصيدة مستحيل:

قلبي رافض إنه يقسى
رغم شاف منك كثير
بس عمره يوم ما يرجع
لو عملت المستحيل
شوف طريقك وانت إبعد
عمر قلبي ما كان بخيل

إننى لو تتبعت ديوان إيمان رضوان ما توقفت ولكننى أكتفى
بذلك لأترك للقاريء الكريم فرصة الإبحار في عالمها الجميل
والارتواء من معينها العذب .

مع أطيب أمنياتى بمزيد من التآلق والإبداع

أديب النوارس الأستاذ /

محمد فهمي

إيه يا زمن

العمر فات والهجر طال

والانتظار

كأنه جمرة ف وسط نار

والقلب شاخ وسط الآلام

راسم علي جدار الزمن

خط الشقا

وحروف كثير تنزف ندم

والذكريات باتت عدم

ولا طعم حلا ف المرار

فين الحقيقة

إنت اللي عارف قد آيه

في قلوب كثير

صافية بريئة

طب ليه بتقسي

كم مرة نعتب أو نلوم

كم مرة ننسى
كم دمعة نزلت م العيون
كم مرة بتزيد ف الغيوم
كم مرة قولت كلمتك
لما انحنى الضهر اللي شال
والشعر شاب
ولا يوم عارضنا
ولا قولنا ليه
ولفين وخدانا السنين
كل اللي طالبينه أمان
وسط القلوب الطيبين

عايز أروح البحر

أنا عايزة اروح البحر
واخودلي شمسية
أمسك ف سنارة
واصطادلي بلطية
أسحبها بالراحة
وبكل حنية
وألقاها مش سمكة
تطلعلي جنية
تقعد وتسمعني
واحكيلها أيه بيا
تسحرلي أحزاني
واكتبها أغنية
أنسى ف آلامي
الضحكة تصفالي
والبال يكون رايق

والدنيا وردية
وكأني كان حلمي
الراحة فإيديا
فتحت فعيوني
لقتني وحديا
أنده عليها وأقول
فيناك يا جنية
رجلي صوتي صدا
وجاوبني فين هي
قالي غدرت بيك
نطت مع الميَّة
يا خسارة كان نفسي
تبقالي وفيه

جنون الحب

رنين صوتك مابيسبنيش
واشوف القسوة في طباعك
واخالف قلبي ف هوايا
ميرحمنيش
وأقول يا روعي ليه أقسى
وسيبك منه يوم وانسيه
خسارة يكون ف دنيايا
وساكن روعي جوايا
ونبض حروفي وبكايا
مدام بايع ميلزمنيش
يدوب ساعتين
يفوتوا عليّ زي يومين
والوم روعي
وأنتدم علي خصامه
واحس الدنيا من غيره
خلاص وقفت بهجرانه

واستنى
لحد ما يجي يصالحني
يقولي الدنيا من غيرك
متلزمينش
ماهو إنت الدنيا وما فيها
وبعدك عني جنني
ومتحملش ف بعادك
أعيش لحظة
يرق القلب من تاني
وأنسى جفاه وأنساني
واشوف ف عيونه
أحلى كلام
واحس ملكت دنيايا
وبتصالح مع الأيام
واكون جمبه ويوحشني
وأدارى واخبي ف مشاعري
وعزة نفسي تمنعني

وبعمل إني مش سامعة
وانا اللي قلبي داب ف هواه
ولا عارفين ف يوم نبعد
ولا نقرب
ولو قررنا نتفارق
نلاقي قلوبنا بتقرب
وع الحال ده بقالنا سنين
عيونا لبعض مشتاقة
وجوة قلوبنا شوق وحنين
وبنكابر
ولو مرة بنتقابل
بنعمل روحنا مش حاسين
قولولنا ياللي حبيتوا
ده حب ولا تضحية
ولو مش حب يبقى
احنا من المجانين

الجدة الغالية

صندوق الجدة المتعبي
أوراق وخزين
فيهم كام ذكرى وضكاية
بين شوق وحنين
بالصدفة أنا بفتح خضتتي
وبصوتها العالي هزتني
وكأني الكنز المتعبي
أنا هاخدو وافوت
أو هاخذ منهم كام حاجة
إن كان جلابية أو شامة
ولا النبوت
ولا الكوباية المتشالة
بتاعة جدي
وسبرته نحاس وغلالية
وساعة ليدي
وجواب كراكيب

كراكيب وحاجات
حبة جرانين
مع ألف حكاية وحكاية
من عمر قديم
والريحة الحلوة في أوضتها
والضحكة الصافية وحلوتها
والكلمة الحلوة بتحكيها
وبتوصف أجمل شيء فيها
ودموعها النازلة وضايفرها
والزمن الكاسر بخاظرها
عن أمي وخالتي بتحكي لي
وانا بسمع واحكي وتدعيلي
والقهوة السكر من إيدها
معمولة بروحها وطيببتها
وانا بشرب فعلا حبتها
وحشاني يا غالية
وحشاني يا جدة

حبيب عمري

أنا قدت شمع الفرح
وبديت حياتي بيك
وجمعت بستان أمل
بالحب مستنيك
وبشوق وحب سنين
من قلب دايب فيك
بحلم تكون لي
ومن قلبي أكون ليك
أعشق وأدوب في هواك
واتمنى بكرة معاك
وفد كل ثانية أرويك
غزلت حبي شبك
وعملت سنارة
ويا النجوم والقمر

سهرانة محتارة
لا يجي يوم وتغيب
وتبعني بخسارة
أنا اللي بيك عايشة
وفد كل حرف أناجيك
إنت حبيب عمري
ماليش حبيب بعديك

نفسي يوم أرتاح

أنا نفسي يوم أرتاح
أنا نفسي أنساني
وأطوي صفحة قديمة
وسوادها قسائي
ألقاني واحدة جديدة
تصالحني ترضائي
وتكون بقلب جديد
تضحكي علشاني
إمتي الزمان يصفالي
وتروق لي أيامي
والدنيا تمد أيدها
بالحب تملاني
تمسح دموع عيني
وتداوي أحزاني
أنا عمري ما كنت قاسية

ألمها قساني
نسيتني حتي أنا مين
من كتر أحزاني
ولسة عندي يقين
أحضني من ثاني
ممكن ف يوم الفرح
بعد الضلام والويل
يجيني من ثاني
والقى ربيع العمر
فتح لي ياسمينة
واجمع جناين هنا
تحاوطها أغصاني

صعب جدا

صعب جدا أقول حبيبي
وانت قلبك مش معايا
عمر قلبك يوم ما حس
كان هوالك ليه م البداية؟
قلبي حبك و بجنون
عمر قلبي ما قال تخون
عقلي كان يملاه الظنون
تطفي روحي نار هوايا
كل كلمة تقولها ليا
قلبي بيشوفها بعنيا
حتي لما تقسى مرة
كنت بغفر ألف مرة
وانسى كل كلمة مرة
حتي لو دمعت عنيا

كنت دنيا بعيشها ليك
روحي كانت بين إيديك
مهما تبعد رايحة ليك
وبإديك جنيت عليا
صعب جدا أشكي تاني
ولا يوم تحضن غرامي
مستحيل هتكونلي تاني
ولا أعيشلك لو ثواني
قلبك إنت كان أناني

عاشقة الليل وقمره

السحاب غطى السما
واختفى نور القمر
كنت عاشقة الليل وقمره
روحي كانت ملهمة
كنت شايقة ف ضي عينه
الأماني والحنين
كنت كاتبة حروف لاسمه
بس ضاعت ف السنين
كنت سكة ليل طويلة
فيه تدوب العاشقين
كنت فرحة لابسة توب
كان بياضه سواد حزين
كنت قلب جوة قلبي
الجدار شايقه متين

كنت بروي بنبضي روحك
وإنت فرعك كان أنين
لما دبلت الأمانى
وانطفئ الشوق والحنين
كنت فرحة فـ عيني
لكن..
كات عيوني عميانين

القلب كله ألم

السكة ليه طولت
آخرة طريقي آيه
محتاجة بر أمان
أخطي بكرة عليه
يا ليل سوادك شجن
والقلب كله ألم
والروح تلوم م الندم
آخرة بكايا آيه
العمر عدى وراح
والقلب كله جراح
بنده علي الأفراح
نسيت طريقي ليه
حتي الأمل مفقود
رغم إنه كان موجود

تايه وف الملكوت
فاضل أضحي بآيه
صرخة ألم من موت
طلعت بأعلى صوت
يسمعا صمت الجبل
ينطق بعلو الصوت
من ظالم حاسس بيه

نظرة رضا

نظرة رضا يا سنين
عاشين ومش عاشين
بنمر ع الأشواك
والقلب فيه بساتين
عطشان ف ليل الفراق
مروي بدمع حنين
يحلم بيوم اللقا
حاضن معاه جراحه
عاشين حياتنا فراق
وعيوننا ما ارتاحوا
يا روح فارقها الحياة
ف البعد أنا سواح
عدت نجوم الليالي
حتي ف مسا وصباح
غاب القمر ف السما
خاصمني وانا مداح
إمتى ليالي الصفا
والقلب يوم يرتاح

مليش غيركم

ياللي مليش غيركم
ليه القسا منكم
طول عمري بتسامح
والغدر كان منكم
قلبي اللي بيحبكم
صعبان عليه منكم
لو كنتوا يوم صونتوه
ما كان شكا منكم
سببتوا فيه الجراح
لما اتحرم منكم
أصل القسية حرام
ويا ما شاف منكم
حبيل الوداد أهو داب
إن كان ده يرضيكم
ومعدش بنا عتاب

لو روحه كات فيكم
أنا قلبي عمره ما خان
وكان بيرضيكم
مهما يلقي الجفا
يصفى وشاريكم
بعته بأرخص تمن
مع إنه شاريكم
إن كان ده طبع البشر
الله يهديكم

عندليب الهوى

يا عندليب الهوى
الحب مش بشروط
الحب زي القدر
عمره ما يعرف خوف
لو كان علي الأشواق
في منها وزيادة
بملا الحنين بكفوف
وتصد كالعادة
لو كنت قد الشوق
أسهر مع نجومه
أشكيله عن حالك
واتدارى ف عيونك
لو ف الهوى مجنون
ماتسوقش ف جنونك
لو كنت قيس الهوى
أنا ليلي مجنونك

برد الشتاء

التلج بات ف الروح
محتاج يحس بدفا
طالت ليالي الشتاء
والذكريات مرعبة
تلمح ف عين الحنين
جوة القلوب بتدوب
والروح تموت م الجفا
لا ريحتها دموع
والصمت طبع الوفا
يا حلم كان ألوان
جوايا عايشني
حضنك معدش أمان
من ليله خوفني
البرد بات ف الضلوع

واتملك الآلام
وعيون تنام وتقوم
وعیوني ما بتنام
عدت خطاوي السنين
واتجددت أحزان
والفرح كان سكته
أبعد لروحي مكان

الغدر كان منكم

متكسروش الخواطر
وتقولوا من حقنا
قبل ما تظلمونا
ما تكسروش قلبنا
عيشتم معانا سنين
كان الوفا طبعنا
والغدر كان منكم
عمره ما كان مننا
أيام ورا أيام عدت
ما نام جرحنا
نحكي لمين ولمين
هيحس يوم جرحنا
قولنا العوض موجود
يداوينا بيه ربنا
حتي الطريق إن طال
هنكملوا لوحدنا
وكفاية ظلم البشر
وجع الألم قلبنا

ضاع الطريق

إنّ رايح ولا جاي
واللا تايه ف الطريق
قلب مين حبك ف يوم
قلب مين صافي وبرئ
ياللي شاييل ف الهموم
وف سماك الليل غيوم
ليه تقاسي الدنيا وحدك
ليه مفيش جمبك صديق
ليه تدور ع الأمان
وانت بتآمن كثير
سببت روحك للي باع
واللي معدوم الضمير
واللي تهديه ابتسامة
كان جزاءك غدر ياما

كان ببيضحكك قصادك
وشه زي ملاك بريئ
قلبه كان حاقد عليك
وانت إيدك بين إيديه
كان بيتمنى هلاكك
وانت كنت خايف عليه
خدت أیه وعملت أیه
غير خداعه وظلمه فيك

مستحيل

قلبي رافض إنه يقسى
رغم شاف منك كثير
بس عمره يوم ما يرجع
لو عملت المستحيل
شوف طريقك وانت ابعد
عمر قلبي ما كان بخيل
كان كثير بيفيض ويدي
وانت حبك كان قليل
كنت شمعة ف هب ريح
قلبي مخلص كان بيغفر
كنت تقسى وكنت اسامح
كنت تجرح قلبي صالح
كان شاريك وكنت بايع

مات خلاص م الظلم فيه
عمره ثاني ما عيش مكانك
أو هينسى يحن ثاني
أو ف مرة يحتاج إليك
لو هيشرب من حنانك
أو يبوح لو روحه فيك

قلب قاسي

مـ البحر وموجه وأسراره
وعيون مـ الحب بيداروا
وأيديا بتحضن ف الرملة
والقلب بيعزف أوتاره
وسمايا بتغني طيورها
والموج بجماله ومشواره
والصخر بيسمع أفكاره
واحكيه كل المداري
والنسمة الراححة والجاية
تلمسني بشوق وبحنية
وتقولي خليكى شوية
قلبك ليه يقسى على حاله؟

صوت أوجاعي

يا خالق فيَّ إحساسي
وعالم بللي جوايا
أنا م الدنيا تعبانة
وعاملة إني نساية
ومين غيرك أفضفضله
وأسجدله ف بكايا
ف عز آلامي ودموعي
وقلبي مليان بجراحه
كتمت ف صوتي أوجاعي
وحتي عيوني ما ارتاحوا
ولو هسكي هقول لمين
يداوي جروحي ويايا
يطبطبني ويحضني
وأطيب خاطري ف قسايا
يا عالم بللي جوايا

يا أرحم بيّ من روعي
أنا يا ربي بدعيلك
بعز ما فيّ من نوحى
تخف آلامى وعذابى
تقرب منى أحبابى
ف وسط الكون بكون وحدي
وخوفي قتلني جوايا
عشان خيبتى كثير م الناس
وكسرة نفسى جوايا
يا رب مليش غيرك وحدك
يا أغلى ما ليّ يا هدايا

ربيع حزين

يا ورد ليه الربيع عنك بيتأخر؟
إن جه عليك فرحك وإن غاب بتتأثر
نزلت دموع العيون زي الندي ف الفجر
بتحيي ف الأوراق تشكيها نار الهجر
تحكيها ع الأشواق
واللي انكتب ليها
وازاي عاندنا القدر والوجد فاض بينا
رد البنفسج حزين م اللي جرى ليها
قلوبنا مش ملكنا والفرح مش فينا
ياللي سكنتوا الفؤاد الروح بتهواكم
زي النسيم للربيع وعيونا عشقاكم
إن غبتوا عنا سنين قلوبنا فاكر اكم
ومهما طال البعد هنحن رؤياكم
ولو فرقنا القدر عايشين بذكراكم
إنتم ربيع الحياة والجنة ف هواكم

ممنوع من النسيان

خبيني فـ حروفك
مـ الذكرى مـ الأيام
اكتبني فـ سطورك
ممنوع من النسيان
ارويني بحنانك
أنا روعي عطشانة
عيشني فـ غرامك
طيبني مـ الأحزان
قلبي الغريب تايه
ما لاقى بر أمان
عشقال فـ أحلامي
وانا صاحبة قدامي
وعيونى لو تغفل
تحضني فـ منامي
أنا اللي بيبك عايشة
وغرامي مش أو هام
مكتوب لأقداري
ممنوع من النسيان

يا شمس يا مروحة

يا شمس يا مروحة
ودي لحبيبي سلام
بوسيلي نن عيونه
واهديله أحلى غرام
سهرانة بستناكي
للصبح مش راح انام
بس أمانة عليكِ
تجبيلي منه سلام
وتطمنيني عليه
وتمدي إيدي لإيده
وقوليله أحلى كلام
قوليله دبلت جفوني
مـ البعد والحرمان
قلبي اللي دايب حنين
بيحبه وبيهواه
مهما تمر السنين
فاكره ومش هنساه
عاشقة عيونه السود
وبعيش خيالي معاه

نزلت أرضك محبة
وقولت يا سيدي
مديت إيديَّ بحب
وكأني يوم عيدي
مليت كفوفي حنان
وشربت من إيدي
قولت ده شهد العسل
حبك فوريدي
عديت معاك الجسور
وحلمت بالجنة
لما وصلت الباب
بحلم وبتمنى
مديت إيديَّ افتحه
لقيت أمل كداب
بعد اما كان لي شهد
بقى كله نار وعذاب
رجعت تاني الطريق
سكة ماليها ضباب
وأنا وحدي معمية
بمسك بإيدي سراب

إنت مين..؟

إنت مين
ياللي بكتني الليالي
سببت جرح لقلبي غالي
عايشة عمري واموت عليه
سبته ينزف بين إيديك
حتي ما صعبتش عليك
بحر حبك موجه عالي
قلبك انت ده أيه
صخره دايمًا حادة ليه
كل شيء بيهون عليه
حتي ف هدوءك بعاني
قولي أروح منك لفين
لحن حزن دموع أنين
حيرة تايهة ف السنين
شهد متحلي ف مراري

العقل تاه

يا حروف يا متحيرة
هربانة ليه مني
قلبي اللي ضيعتية
حبي اللي توهتية
وجعي اللي بينتية
حتي اما أمنتك
ع الدمع ف عيوني
خُنتِ وكذبتيه
العقل تاه واحترار
طب أيه فضل مني
كنت انت أقرب لي
م الدنيا والأيام
كنتِ الدفا والحضن
كنتِ بر أمان
حتي ف ساعات
الوجع كنتِ
كنتِ لقلبي السلام
مين اللي قسالكِ
وفُتّيني للحرمان

يوم الراحيل

يا ورد من غير ورق
الشوك جرح إيدي
يا فرحة متبسمة
ضايعة ف يوم عيدي
يا دمة جوة العيون
ساكنة ومكسورة
محيرها الهموم
والضحكة مقهورة
يا سنين يا متبعترة
لمي ف كراكيك
يوم الرحيل ع الباب
يحسب ف مواعيدك
لا ساعة متأخرة
لا دقيقة ولا ثانية

رايحين ومش راجعين
دنيتنا دي فانية
أيام ومش حاسين
ساعة تفوت ثانية
واحنا ولا عارفين
بنلف ف الدائرة
كل اللي حاسين بيه
تعبنا م الدنيا

عابر سبيل

غريب وف غربتي رحال
بلف الدنيا ليل ونهار
ومهما تعبت وبقاسي
ومهما مشيت ليالي طوال
لا عمري يأسـت مـ الغربـة
وبعافر مع التيار
ويحلالي غناوي الصبر والموال
أنا ف العـشق ده غاوي
وطول عمري وانا مداوي
بداوي جراح ولا اتكلم
وبرسم حلمي وانا خيال
ولا كليـت ف يوم مـ الحـلم
وصابر حتي وسط النار
وعامل صبري ضليلة
وأعبي الفرـح ف صراير
وأفرق منه باستمرار

وراضي حتي لو وجعي
يمس روعي جوايا
وأحب اسهر مع نجومى
وبضحك ليها ضحاكية
ولما ابكى بتتألم
وتلمس فيّ نجوايا
منيش ساحر ولا سحر
ولا طمعان يكونلي قصور
أنا كل اللي بتمناه
أحس بأن انا موجود
ولو هحلم بأنى أعيش
بلاقي الحلم ماله حدود
لا انا غاوي أكون وحدي
ولا حبيب أكون مختار
أنا بحلم بستر أموت
وراضي أكمل المشوار

ليل الفراق

يا سنين ومتبعترة
ليه اللقا نساي
ساب الجراح والألم
بكاني عمري الجاي
ليل الفراق لو طال
وانت بعيد عني
وسط دوامة الحياة
الفرح ضاع مني
كل اللي عشته ف ضياع
وتعبت انا مني
لا قادرة أداوي الجراح
ولا حتي بحضني
حاولت أموت جمبها
صعبت انا عليها
قالتلي لسة الحياة
ليك جميل فيها
وبأيه تفيد الحياة
وانا بموت فيها
يمكن مماتش الجسد
والروح ماتت فيها

أنا عاشقك

أنا العاشق وأنا المسحور
سحراني بسمار ليلك
ببص واشوف عنيك بحور
واخطي في ضلام ليلك
بحبك مش كفاية أقول
أنا دايب في تسبيلك
وجوة عنيك ألف وادور
وارجع أرتوي بنيلك
يا غالية يا أغلي ما لي
بموت في الطمي من نيلك
واحب اشرب كمان وأقول
يدوم الخير علي إيديك
يا جنة أحلم أموت فيها
وأتكفن بمنديلك
ومهما ألف وأجيلك
ألقي غنايا تعبيرك
واحب اسهر مع نجومك
وأكتب في مواويلك

معاكِ بكون قوي وموزون
وبقدر أحمي تأويلك
وأقدم روحي يا عمري
وبفديكِ بروحي
وعقلي شاريكِ
ولو طال الأجل بيَّ
أعيش يا غالية وأحميكِ
ولو مُت عليك هقول
لكل بعيد عشان خاطرك
في يوم يرجع عشان
يزرع أراضيكِ
واسيبلوا مكاني
وأقوله يعيشك حر
ويضلل علي أرضك
يخاف عرضك ويحميك
حبك.. بحبك لو هقول وهقول
ما يكفي كلامي غير فيك
أنا عاشقك بدوب فيك

عفريته عشقاني

اقفلُ عليك الباب
بالضبة والمفتاح
واوعي هوايا يجيك
من تحت عقب الباب
عالي ما بينا السور
ركب ف ألف إزاز
وإن فات عليك صوتي
اعلمي منه حجاب
اكنم هوايا ف قلبك
وقول لكل الناس
عفريته سكاني
بعشقها في منامي
وهي عاشقاني
وكل يوم أقرأ قرآن
لها ع الكاس
ترحمني وتسيبني
أو تنحرق بجاز

تنطق تكلمني
أنا وردك اليومي
ولو حصنت روحك
ف قلبي وف دمي
ميهمنيش ف الحياة
ولا خالي ولا عمي
وإن كنت يوم بعثتي
هتشوفني كل الناس
أنا اللي بدعيلك
من النبض والإحساس
كل اللي بيهمني
ف الدنيا دي راحتك
مش جاية بستعطفك
ولا بشتري خاطرك
أنا بس بعرفك
فاهمة اللي ف خاطرك
سببتك وأنا عارفة
مكاني أيه جواك

بحر حياة

وبغرق وسط بحر حياة
بيحذفني لأبعد موج
مفیش مركب ولا مجداف
وبصرخ مش بيطلع صوت
ومين يسمعني ف ندايا
صدايا يعدي أي حدود
ومين هيحس بعذابي
وأنا بغرق ف بحر الموت
يا دمة عيني يا حزينة
ولا ف مركب ولا ف مينا
ولا صاحب يواسينا
خلاص الكل عاد مفقود
أنا اللي بتوه في بحر حياة
سطور الماضي صاحبتني

برغم اني مالىها جراح
وساكنة روحي جوايا
مفيش ولا مرة فارقتني
أنا اللي فليلي سهرانة
وكلمة آه تزيد همي ما نصفنتني
أنا اللي قلبي كله هموم
وصابرة بجرحي ع الأيام
وليه الدنيا تعاندني

بكلم روعي

يا ساكن قلبي و عيوني
ووخداك السنين مني
لا يوم جاني خبر عنك
ولا مرسال يطمني
واتوه واسرح بأفكاري
وليل ونهار أنا وياك
لا يوم بنسي ولا بهدى
ودوبت الحنين ف هواك
واكلم روعي واشكيلها
ليال الصبر ف غيابك
تطيب خاطري وتقولي
راح افرح تاني بكرة ألقاك
وانا عايشة علي الذكرى
وليلي يفوت ولا بنساک
وبلضم مـ الحنين قسمة
ويومي سنين ولا بلقاک

دموع عاصية

الدنيا رغم الوسع ضاقت حواليا
رغم براح الكون مش شايفة بعنيا
نفسى ألقى فـ يوم فرحة تكون ليا
القلب كله هموم والجرح بات فيا
بتمنى قبل الموت أشوفها بعنيا
لو جات على بابي غلطة مهيش ليا
دموعي حتي فـ نار عاصية وحرقاني
استخسرت تنزل من وجعي وجعاني
الشكوي مالية القلب وألف آه ياني
من يسمع إلهي انتظلم
مـ الجرح بيعاني

غربة الروح

مجروح يا صوت الفراق
الساعة فيك أيام
الغربة جوة الروح
بتولد الآلام
سافرت فليل طويل
علي سكة الأحلام
فرشت بساط الأمل
علي أرض مـ الأوجاع
لمحت عيون سلمت
جواها شوق وحنان
من بعد طول السفر
فرحت بحلم زمان
لكن نهاية الطريق
سد ما كان له أوان

أطلال الماضي

زي أوراق الشجر
لما بتوصل للخريف
دبلت ملامح في الوجوه
مع كل صيف
ويقولنا فات الزمن
ضاع اللي كان
نشف الورق قبل الألوان
واصفر قبل م الزمان
يقول وينطق كلمته
معقول.. خلاص
عدي وراحت صفحته
طب أيه فاضله
مين اللي باقي ف سكته

مين اللي يأنس وحدته
مين اللي يجمع فرحته
لما هيطلع النهار
ويلقي حلمه المنتظر
مات واتكسر
ومعدش ينفع الانتظار
نزلت ورقته من الشجر
والروح بتعلن الاحتضار

جدار مشروخ

جدار مشروخ مع الأيام
يزيد الشرخ من جوة
ملوش ترميم تعدي مواسم
الفرقة في بيت
مات فيه أصحابه
بقالوا سنين معاش
ماضي كله آلام وذكرى
علي الحيطان صور
مرسومة محفورة
وممنوعة من النسيان
زمان كان فيه هنا العيلة
كانت فرحة كانت بسمة
كانت أيام وكان فيها

من الفيضان حب وحنان
وفين أيام لما كنا عيال
ولا شايلين من الدنيا
ولا بنعاني مـ الأيام
كبرنا ف بيت ما بين
أصحاب وبين إخوات
وبين أم وبين أب
وبين زرعة بنرويهـا
في قلب جنينة بتعلم
فـ قلوبنا بخير وسلام
هنا الضحكة..
هنا الفرحة..

هنا الأحزان..

هنا الإيد..

اللي بطبطب تلاقي أمان
وكلمة حلوة بتهون
علينا الصعب م الأيام
هنا الإيد اللي ماسحة دموع
وبتداوي جراح حرمان
خلاص مبقاش
راحو الناس اللي
كات بتحلي ف عنينا
مرارة الأيام
وادي البيت اللي جمعنا
بقي جدران معشش بعنكبوت
حيطان بدموع
بتتصعب علي الأيام
تنادي علينا بمحبة

تعالوا جففوا دمعني
تعالوا واحضنو الذكري
بلاش تزيدوا ف الهجرة
تعالوا نرجع اللي كان
وندعيلهم ونترحم على أصحابه
يا رب ما تكتب الفرقة
ولا الحرمان

برة مني

نفسى أسافر برة مني
وأبقي واحدة غريبة عني
نفسى أنسى وأنسى نفسى
وألقي روجي الضايعة مني
نفسى أشوف الدنيا حلوة
بعد هم الكون سكني.
نفسى أحس بروحي عايشة
فدنيا مشوارها كسرني
نفسى اعيش واحلم ببكرة
بس ضاع الحلم مني
نفسى قلبي يحس راحة
بعد ما الحزن قتلني
نفسى أنسى واعيش لبكرة

وانسى أمسي اللي ظلمني
نفسى ألقى الأمان يا دنيا
ليه يضيع الحب مني
نفسى ألقى منك حنان
ليه بعيش أضعاف بسني
ياللي كنت بتقسي عليا
حسي بي وباللي مني
مستحيل هعيش ف دنيا
وألقى حمل الكون قاسمني

بحبك

يطول ليلي وانا عايشك
وشايل ف البكا همك
وأنا جواك بشتاقلك
وبدعيلك يزول همك
يفرج كربته عنك
وألقى الفرحة ف ملامحك
عروسة تزين الأيام
وعرسك ف السما فرحان
يا أجمل اسم ف الدنيا
يا نبع الخير يا بر أمان
وراسك للسما السابعة
ولا تطاطي لأي جبان
واشوف ف عنيك أحلامي
تخضر أرض بستانني

ونقطة مية من نيلك
بثرويني أنا ظمان
واعيشك ألف فجر جديد
وشمس تنور الدنيا
ولا بتخلف ف يوم مواعيد
ما هو انت الماضي والحاضر
وأنت الحزن وأنت الدار
يا لمانا محاطانا بحنانك
واحنا لسة صغار
ومهما نلف نرجعك
ونتمناك ليل ونهار
نموت ما الهم لو مرة
نشوف دمعك
بيحرق فينا باستمرار

وبنحبك..
نتوه ف الدنيا من بعدك
وبنعاند مع التيار
ولو كل اللي حبوك بيتعاهدوا
يخطو ببيك وسط النار
ولو بينا في مين خانك
ما يستاهل يعيش ولا يوم
علي أرضك أنا عارفك
حاميك الواحد القهار

كل لحظة فرح

أنا كل لحظة
فرح من عمري
كانت ندم
كل الحقايق زيف
والضحك أصبح عدم
ياللي فقدتوا الشعور
إزاي بقيتوا كده
إزاي بتبنوا جسور
وحياتي كبش فدا
هو ألم الغير بقى
سهل بالشكل ده
متفرحوش بالقوي
الدنيا دوارة
كاس الألم دوار
والصبر ده شطارة

بكرة عيوني تشوف
كل اللي سقتوني
وتكونوا في مكاني
وتحسوا مضموني
وتدوقوا ما الأيام
إللي روتاهولي
بس انا مش زيكم
وأفرح أنا فيكم
هدعي بدموعي وأقول
يا رب يهديكم
قد ما قلبي اتظلم
مش هدعي عليكم
لكن كفاية أقول
حسبي الله فيكم

زمن قاسي

فد يوم حاسبت فيه نفسي
وقولت أشوف سجلاتي
أشوف كم مرة دوقت الفرحة
وأشوف كم جرح في حياتي
أشوف الناس على أصولهم
أشوف كم مرة جرحوني
وقلبي كان يسامحهم
وأشوف كم مرة ظلموني
وأرضى باللي يريحهم
أشوف مين اشتراني فد يوم
وخاف حتى عليا فلوم
ليقتسى عليا وأكرهم
وأشوف مين اشتريته وباع
وسبيلي الألم منهم

أشوف مين اللي قربلي
ومين البعد واخدهم
لقيتك يا زمن قاسي
مجرح كل إحساسي
وصفحاتي مليانة دموع
وكاتبة القصة ف جبيني
ألم ومرار زمن غدار
وختمه بيان ف كُراسي
وحتي الضحكة مخدوعة
بتسحب مني أنفاسي
قفلت كتابي بإديّ
ودمعي ع الخدود راسي
بقول آسف يا زمني
خلاص حقك على راسي

دنيا متفاته

وأهي دنيا
واخدانا منا وسارقانا
ماشيين وبنخبط
وعيوننا عميانه
ماتت ضمائرنا
والكذب بقى عادة
أخلاق بتتصنع
بالحلو وزيادة
زمن الوفا كان
مبقاش لحد أمان
نسبنا مبدأنا
واللي وعينا عليه
وبقينا نتسابق

في الدنيا دي على أيه
آخر الحياة موتة
والدنيا خداعة
تلبس فـ مليون وش
والنفس طماعة
يا ريت نفوق مـ الوهم
ونعيش بلون واحد
ونرضي بالمقسوم
ونوحد الواحد
إللي خلق الكون
قادر يعدلها
ومهما مالت حمول
ربك هيعدلها
الشر من نفسنا

لو عدلة يعدلها
ولو مالىها العوج
منك ف أولها
ارجع لربك وتوب
الدنيا متفاته
مهما بتذوق
المر بزيادة
لا مال عليها يدوم
ولا روح بتتخذ
هيجي وقت الأجل
والكل يتجازى

لون الحياة

ف الدنيا ياما قابلت ناس
عايشة الحياة وبتحبها
أقول دي ناس
عايشة وخلص
ومفيش مشاكل عندها
قربت أشوف لون الحياة
بعيون قلوب مزهزة
لقيت هموم ساكنة العيون
محتاجة حد يحسها
دمعة فراق بعد الغياب
نزلت بتدعي ربها
دمعة هموم وسط الغيوم
والحزن كاسر نفسها
دمعة فرح بعد الألم

كأت ناسية يوم ترجع لها
دمعة وجع جوة القلوب
ولا حد طيب جرحها
لميت ألامى بين ضلوعي
وأنا راضية حتى بغابها

كدة النهاية

معقول خلاص كدة النهاية
معقولة خلصت الحكاية
معقول أكمل عمري آلام
ولا حتي أفرح ف الأحلام
معقول كل حياتي ضايعة
وانا بين سطور من الأوهام
معقول يكون حرفي صديقي
ويبقى جمبي وقت ضيقي
حتي القلم يبكي معايا
ووجعه دمعي من البداية

إزاي أكون دايمًا حزين
وانا بين بشر وبني آدمين
إزاي أكون كراس جماد
بكتكم جراحي طول الأوقات
وانا ليَّ قلب مَ الظلم مات
أصعب ما فيه بيعيش أنين

أنا والقهوة

أنا والقهوة متصاحبين
بقالنا سنين
ف نفس الوقت متواعدين
بقعدة حلوة ف البلكون
وأغنية
لو كانت بصوت ثومة
وألّف حكاية وحكاية
وضحكة تجر دمعاية
وذكري بعيدة عن عيني
لكن أثرها جوايا
ونترحم علي الأموات
وعد الأيام..
وعد الأحلام..

وعد العمر..

اللي عدي وفات
وتيجي النسمة وتعدي
وتفرح بينا وتهدي
وشايلة قلب لون وردي
بيهديني ثلاث سلامات
يهدي حنين وشوق دايب
لكن غايب
ويمسح دمع كله آهات
حبايب غايبة عن عيني
لكن حاضرة طول الأوقات
برغم العمر عدى وفات

دموع غالية

دموعك غالية ليه تبكي؟

وليه واقفين علي بابك؟

ده لسة العمر قدامك

تعيشي ف حزن أحبابك

ولو مرة زعلتِ عشان

عشمتِ ف حد يخلابك

خلاص انسي ولا يهمك

يدوق الحزن ف غيابك

ساعتها بس هيجيلك

ويتمناك من تاني

تسامحي وتنسي وتحني

يدوق الفرح علي بابك
وتلقي الحب ف عيونہ
يعوض حزنہ ف غيابك
تعود البسمة ف عيونك
يحب الحب ف عنادك

وشوشت الودع

أنا قلبي كله وجع
والغدر بيه زيادة
وشوشت كل الودع
وتعبت بزيادة
قالولي قلبك عليل
مالوش دوا يشفيه
لا أطبة نفعت فيه
وجروحه بزيادة
أنا قولت أرقع فيه
واعملي كام غرزة
يمكن ما بين الغرز

يهدى كدة ويرسي
وبقول يا رب برضا
ألقالي يوم مرسى
مهما يكون الوجد
بالقرب لك يشفى

خد بهتان

إزاي أداري البكا
ودموعي مالية العين
والقلب كله وجع
مهموم بقاله سنين
رسمت ضحكة فرح
علي خد كان بهتان
ولبست توب الجمال
وجماله كالبيستان
منقوش بلون السما
والقلب فيه أحزان
بات الغريب ف الخلا
ولا لاقى بر أمان
ناسي منين سكته
وطريقه كان أحزان

وش الزيف

إللي خانك واللي باع
واللي سابك للضياع
واللي تخلصه بقلبك
وشه زيف لبس قناع
إيه جرالك إيه يا دنيا
كل ساعة لابسة لون
ناس يبان الصدق فيها
وناس بتقلب ألف لون
فين حقيقتك فين صفاك
موتنا م القسوة وجفاك
ليه بنتمني رضاك
وانت شمسك م الغيوم
مين كويس مين جبان
مين ملاك ومين شيطان

مين حرامي ومين إمام
في النفاق صافي وحنون
وناس كتير صابها العمى
ناس بتغرق ف الهنا
وناس وجعها للسما
مين هيمسح دمع عينها
ولا طيب يوم خاطرها
نفسى كل الدنيا تسمع
قلب ناس حسست بغيرها

بعقلي نسيتك

علمني ازاي أقدر أقتسى
وانسي وما أقدرش أسامح
علمني ازاي أهجر وأبعد
وأعيش يومي وأنسى أمبارح
علمني ازاي قلبي يبيعك
ويدوس على قلبك ويسيبك
علمني ازاي تبقي ف روعي
وأنا أقول اني بعقلي نسيتك
علمني ازاي تسكن قلبي
وأنا ضعت خلاص
من بين إيدك

ناس وناس

في ناس غطاها السما
وناس قارصها الجوع
وناس كثير ضايعين
فدنيا ماليها رجوع
وناس تبات مالألم
بكاهها من غير صوت
وناس ف عز الوجع
بتداري حتي الموت
وقلوب مليانة جراح
ودواها فين تلقاه
حتي الهنا والفرح
مبقتش تتمناه
ماشية طريق الحياة

ربك عالم بيها
أيام كثير بتمر
والحال علي دا الحال
لا بتسأل اللي ظلم
ولا عايزة منه سؤال
جروحها متكفنة
والحلم حتي محال

الفهرس

٤٨..... يوم الرحيل	٣..... التعريف بالشاعرة
٥٠..... عابر سبيل	٤..... كلمة أبقت القلوب
٥٢..... ليل الفراق	٥..... المقدمة
٥٣..... أنا عاشقك	٩..... إيه يا زمن
٥٥..... عفريتة عاشقاني	١١..... عايزة أروح البحر
٥٧..... بحر حياة	١٣..... جنون الحب
٥٩..... بكلم روحي	١٦..... الجدة الغالية
٦٠..... دموع عاصية	١٨..... حبيب عمري
٦١..... غربة الروح	٢٠..... نفسي يوم أرتاح
٦٢..... أطلال الماضي	٢٢..... صعب جدا
٦٤..... جدار مشروخ	٢٤..... عاشقة الليل وقمره
٦٨..... برة مني	٢٦..... القلب كله ألم
٧٠..... بحبك	٢٨..... نظرة رضا
٧٣..... كل لحظة فرح	٢٩..... مليش غيركم
٧٥..... زمن قاسي	٣١..... عنديب الهوى
٧٧..... دنيا متفاته	٣٢..... برد الشتا
٨٠..... لون الحياه	٣٤..... الغدر كان منكم
٨٢..... كدة النهاية	٣٥..... ضاع الطريق
٨٤..... أنا والقهوة	٣٧..... مستحيل
٨٦..... دموع غالية	٣٩..... قلب قاسي
٨٨..... وشوشت الودع	٤٠..... صوت أوجاعي
٩٠..... خد بهتان	٤٢..... ربيع حزين
٩١..... وش الزيف	٤٣..... ممنوع من النسيان
٩٣..... بعقلي نسيبتك	٤٤..... يا شمس يا مروحة
٩٤..... ناس وناس	٤٦..... إنت مين
	٤٧..... العقل تاه